

Канон священномученику Киприану и мученице Иустине

Празднование 2/15 октября

Глас 4.

Песнь 1

Ирмос: Моря чермную пучину невлажными стопами древний пешешествовав Израиль, крестообразными Моисеевыми руками Амаликову силу в пустыни победил есть.

Припев: Священномучениче Киприане и мученице Иустино, молитесь Бога о нас.

С премирными чинми ныне водворяясь, о священная и божественная главо, с Небесе призри на благочестно поющия тя и твоими молитвами сохраняй.

Священномучениче Киприане и мученице Иустино, молитесь Бога о нас.

Во мраце неведения, преподобне, люте одержим и душегубными страстями плоти невоздержанием ты разжигаем, предложение преславно обрел еси внезапно, всеблаженне.

Слава: Губителей убо на седалищи прежде, отче, седел еси и на седалищи пресвитеров паки Христа прославил еси, изменився явленно Владычню Божественною благодатию.

И ныне: Дева по Рождестве пребыла еси: Самого бо рождши Творца всех и Господа, необычно и странно нам явльшася телом, Богородительнице Мати Приснодево.

Песнь 3

Ирмос: Веселится о Тебе Церковь Твоя, Христе, зовущи: Ты моя крепость, Господи, и прибежище, и утверждение.

Священномучениче Киприане и мученице Иустино, молитесь Бога о нас.

Яко Павел, ко Христу душевную любовь преложив, Киприане всеумудре, того ученик был еси.

Священномучениче Киприане и мученице Иустино, молитесь Бога о нас.

Обручает ти Христос, вместо риз страстных одеяние славы даруя и возрождения одежду.

Слава: Поустник постнический прежде бывый терпелив, послежде, Киприане всехвальне, свидетель Истины был еси.

И ныне: Господьственно и истинно Тя, Богородицу, вернии почитаем, Ты бо Бога родила еси, плоть бывша, Всенепорочная.

Седален, глас 8.

Наказан в прелести прилежно, яко Павел, зван бысть с Небесе, Крестом наставляем к свету знания, честныя бо девы любовию разжигаем, тоя ради сочетался еси Зиждителю человеков. Тем обличив немощь вражию, с нею сподобился еси лику мучеников, Киприане, архиереев удобрение, моли Христа Бога грехов оставление подати чествующим любовию святую память твою.

Слава, и ныне: В напасти многоплетенная впад от враг видимых и невидимых, бурю одержим безчисленных согрешений моих, и, яко к теплomu заступлению и покрову моему, Чистая, ко пристанищу притекаю Твояя благодати. Темже, Пречистая, из Тебе Воплощенному без семени молися прилежно о всех рабах Твоих, непрестанно молящихся, Богородице Пречистая, молящи Его присно согрешений оставление даровати воспевающим достойно славу Твою.

Песнь 4

Ирмос: Вознесена Тя видевши Церковь на Кресте, Солнце праведное, ста в чине своем, достойно взывающи: слава силе Твоей, Господи.

Священномучениче Киприане и мученице Иустино, молитесь Бога о нас.

Возбнув, богогласе, от неистовства перваго, демонскую лесть и душетленную прелесть всю обличил еси и, радуясь, взывал еси: слава силе Твоей, Господи.

Священномучениче Киприане и мученице Иустино, молитесь Бога о нас.

Доблественно Иустина укрепляема и Чистую Деву и Обрадованную зело молящи, сетей избеже и козней же вражиих.

Слава: Укрепляема верою твоего Жениха и крестною силою одеяна, демоны неятна, вопиющи, пребыла еси: слава силе Твоей, Господи.

И ныне: Иже естеством свободен сый, образом раба обнища богатством благодати, Мати Приснодево, из Тебе по Ипостаси все прием человечество.

Песнь 5

Ирмос: Ты, Господи, мой свет в мир пришел еси, Свет Святыи, обращающаи из мрачна неведения верою воспевающия Тя.

Священномучениче Киприане и мученице Иустино, молитесь Бога о нас.

Поборницу имущи яже Чистую Богоматерь, обогащися. Иустино, честное девство сохранила еси невредно.

Священномучениче Киприане и мученице Иустино, молитесь Бога о нас.

Одушевленный Христов и краснейший образ, почтим Иустину, сокровенную доброту и некрадомое возложение.

Слава: Невеста Христова присная и нескверная, страданием и пощением восприемши, праведно сугуб венец носит.

И ныне: Ум ангельский и человеческий не может сказати неизреченного и преславного чудесе Рождества Твоего, Всечистая.

Песнь 6

Ирмос: Пожру Ти со гласом хваления, Господи, Церковь вопиет Ти, от бесовския крове очищися ради милости от ребр Твоих истекшею Кровию.

Священномучениче Киприане и мученице Иустино, молитесь Бога о нас.

Злобы дна преисподняго дошел еси, к крайнейшей же паки добродетели, отче, возшел еси на высоту, преславно изменився Божественным крещением.

Священномучениче Киприане и мученице Иустино, молитесь Бога о нас.

Был еси слуга демонов первее, но Христов богоявленный ученик показался еси, присною любовию желание возлюбив последнее.

Слава: Многая ты Владыце привел еси мученики, куплей величайшую являя, кровию малейшею Царство Небесное, богомудре, купиши.

И ныне: Расторгни моя пленицы согрешений, Богоневесто, греховнаго закона, Жизни законом свободу дарующи, Владыку закона рождающая.

Кондак, глас 1.

От художества волшебнаго обратився, богомудре, к познанию Божественному, показался еси миру врач мудрейший, исцеления даруя чествующим тя, Киприане со Иустиною, с неюже молиши Человеколюбцу Владыце спасти души наша.

Икос

Целений твоих, святе, дарования мне низпослав, и недугующее мое сердце гноем греховным молитвами твоими исцели, яко да слово пения от скверных устен моих ныне принесу ти и воспою болезни твоя, яже показал еси, священномучениче, покаянием добрым и блаженным и Богу приближающимся. Того бо удержан рукою, направился еси, яко по лестнице, к небесным, непрестанно моляся спасти души наша.

Песнь 7

Ирмос: Спасый во огни авраамския Твоя отроки и халдеи убив, яже правда праведно уловляше, препетый Господи, Боже отец наших, благословен еси.

Священномучениче Киприане и мученице Иустино, молитесь Бога о нас.

На священноначальство вшед, священнейший образ священноначальником себе и правило явил еси, взывая: препетый Господи, Боже отец наших, благословен еси.

Священномучениче Киприане и мученице Иустино, молитесь Бога о нас.

Живоначальная тебе десницы истинно изменение, отче, нашедшее, мудра ты сотвори боговещателя, поюща: препетый Господи, Боже отец

наших, благословен еси.

Слава: Оружие непобедимое нам на противнаго, блаженне, ты явился еси, того обличая лести, поющим: препетый Господи, Боже отец наших, благословен еси.

И ныне: Небеснии лица и Пренебеснии собори песнословят из Тебе, Богородице, Рожденнаго, зовуще: препетый Господи, Боже отец наших, благословен еси.

Песнь 8

Ирмос: Веселися, Иерусалиме, торжествуйте, любящии Сиона: царствуй бо во веки, Господь сил прииде. Да благоговеет вся земля от лица Его и да вопиет: благословите, вся дела Господня, Господа.

Священномучениче Киприане и мученице Иустино, молитесь Бога о нас.

Премудро еллинския мудрости небрегл еси, славне, апостолов же Божественное вещание, Духом бряцаемо, отче, и огненными языки ясно изглашаемо, вопиял еси: благословите, вся дела Господня, Господа.

Священномучениче Киприане и мученице Иустино, молитесь Бога о нас.

Востекл еси на высокая и премирная светло селения, Христу кровию, яко жертвою непорочною, приносим, отче, заколение живо, приятно и благоугодно, воспевая: благословите, вся дела Господня, Господа.

Слава: Побеждаеми от в тебе всельшиися благодати, демонстии полцы отгоняются и отбегают страсти недугующих, богомудре, вернии же Божественнаго света насыщаемся, вопиюще: благословите, вся дела Господня, Господа.

И ныне: Ликують со ангельскими, Пречистая, силами о Рождестве Твоем, Богомати, и Богородицу верою Тя именующии: Ты бо Владыку и Избавителя нам родила еси, Емуже поем: благословите, вся дела Господня, Господа.

Песнь 9

Ирмос: Ева убо недугом преслушания клятву вселила есть, Ты же, Дево Богородице, прозябением чревоношения миру благословение процвела еси, тем Тя вси величаем.

Священномучениче Киприане и мученице Иустино, молитесь Бога о нас.

Свыше нас, благочестно поющих тя, назираеши Божественною благодатию, твоими молитвами, богоглагольниче, и оружием благоволения венчаяя, мир и спасение даруй нам, яко священноначальник божественнейший

Священномучениче Киприане и мученице Иустино, молитесь Бога о нас.

Течение исцелений обильно персть твоя любящим тя воздает; тебе же, Киприане, жены богоносны яко Божественно сокровище приемлют и усердно являют сокровеннаго, да вси тебе насладимся.

Слава: Направити наше ко Христу, пребогате, шествие деянием, и

богоугодным житием, и чистейшим очищением сушо Божию тихость умоли, яко иерарх сострадательнейший

И ныне: Укрепи нашу душевную немощь, Богомати, силою Твоею, разреши тяготу, Пресвятая, налагаемую рабом Твоим, миру правды Солнце несказанно возсиявшая.